



Numri: KSC-BC-2018-01

Vendosi: Paneli i përbërë prej një gjykatësi të vetëm
Gjykatës Nikola Giju

Administratore: Dr. Fidelma Donlon

Data: 24 shtator 2020

Gjuha: Anglishte

Klasifikimi: Publik

**Version i redaktuar publik i versionit të korigjuar të
fletarrestimit për Nasim Haradinajn**

Prokurorit të Specializuar

Xhek Smith

T'i dorëzohet

Z. Nasim Haradinaj

Unë, gjykatësi Nikola Giju, gjykatës i vetëm i Dhomave të Specializuara të Kosovës, i caktuar nga Kryetarja e Dhomave të Specializuara sipas nenit 33(2) të Ligjit nr. 05/L-53 për Dhomat e Specializuara dhe Zyrën e Prokurorit të Specializuar (“Ligji”);

Pasi kam marrë prej Prokurorit të Specializuar “Kërkesë urgjente për lëshimin e fletarrestimeve dhe urdhrave në lidhje me to”, shënuar me datë 22 shtator 2020;

Në bazë të nenit 39(3) dhe nenit 41(6) të Ligjit, rregullës 53 të Rregullores së Procedurës dhe të Provave para Dhomave të Specializuara të Kosovës (“Rregullorja”) dhe neneve 387, 388 dhe 392 të Kodit Penal të Kosovës 2019, nr. 06/L-074 (“Kodi Penal”);

LËSHOJ NJË FLETARRESTIM PËR

NASIM HARADINAJN (emri i babait [REDAKTUAR]), lindur më **21 maj 1963** në **Glllogjan, Deçan, Kosovë, NUMRI PERSONAL I IDENTIFIKIMIT [REDAKTUAR]**, vendbanimi i fundit i njohur në [REDAKTUAR], Kosovë.

1. Veprat penale dhe një përshkrim i shkurtër i fakteve

1. Ekziston dyshim i bazuar se Nasim Haradinaj (“z. Haradinaj”) është penalisht përgjegjës për orvatje të kryerjes së veprës penale të frikësimit gjatë procedimit penal në bazë të nenit 387 të Kodit Penal. Konkretisht, ekziston dyshim i bazuar se z. Haradinaj mbajti tri konferenca për shtyp më 7, 16 dhe 22 shtator 2020, ku ai shpërndau ose vuri në dispozicion të medias informacion dhe dokumente konfidenciale dhe jopublike që kanë lidhje me punën e Zyrës së Prokurorit të Specializuar, përmendi me emër disa dëshmitarë (të mundshëm) dhe përmendi të dhëna në lidhje me vendbanimin e tyre dhe të dhëna të tjera personale. Kjo sjellje përbën kërcënim të rëndë ose mënyrë tjetër shtrëngimi që e nxit një person të mos japë

deklaratë ose të japë deklaratë të rreme, ose që të mos i japë informacion të vërtetë Zyrës së Prokurorit të Specializuar dhe/ose Dhomave të Specializuara.

2. Gjithashtu, ekziston dyshim i bazuar se z. Haradinaj është penalisht përgjegjës për kryerjen e veprës penale të hakmarrjes sipas nenit 388 të Kodit Penal. Konkretisht, ekziston dyshim i bazuar se z. Haradinaj mbajti tri konferenca për shtyp më 7, 16 dhe 22 shtator 2020, ku ai shpërndau ose vuri në dispozicion të medias informacion dhe dokumente konfidenciale dhe jopublike që kanë lidhje me punën e Zyrës së Prokurorit të Specializuar, ku përfshihen emra dhe të dhëna personale të dëshmitarëve (të mundshëm), duke i ekspozuar në këtë mënyrë këta individë ndaj kërcënimeve të mundshme kundër sigurisë së tyre. Kjo sjellje përbën një veprim të dëmshëm me synimin e hakmarrjes për dhënien e informacionit të besueshëm Task Forcës Hetimore Speciale dhe/ose Zyrës së Prokurorit të Specializuar në lidhje me pretendime për kryerje të veprave penale.

3. Gjithashtu, ekziston dyshim i bazuar se z. Haradinaj është penalisht përgjegjës për kryerjen e veprës penale të shkeljes së fshehtësisë së procedurës sipas nenit 392 të Kodit Penal. Konkretisht, ekziston dyshim i bazuar se z. Haradinaj mbajti tri konferenca për shtyp më 7, 16 dhe 22 shtator 2020, ku ai shpërndau ose vuri në dispozicion të medias informacion dhe dokumente konfidenciale dhe jopublike që kanë lidhje me punën e Zyrës së Prokurorit të Specializuar, ku përfshihen emra dhe të dhëna personale të dëshmitarëve (të mundshëm).

4. Ekzistojnë arsye të artikulueshme për të besuar se arrestimi i z. Haradinaj është i domosdoshëm për shkak se ekziston rreziku i arratisjes së tij, duke mbajtur parasysh: (i) vënien e tij në dijeni për veprat penale të pretenduara që përmenden në këtë fletarrestim dhe dënimet e mundshme në lidhje me këto vepra penale; (ii) fondet e konsiderueshme në dispozicion të tij si zëvendëskryetari i Organizatës së Veteranëve të Luftës të Ushtrisë Çlirimtare të Kosovës; (iii) mbështetjen e tij në një rrjet të gjerë përkrahësish ndër të cilët persona ekspertë në çështje të sigurisë, policisë dhe

inteligjencës; dhe (iv) aftësinë e tij për të udhëtuar në mënyrë të ligjshme e të paligjshme në vende sipas juridiksionit të të cilëve nuk ekziston obligimi i transferimit në Dhomat e Specializuara.

5. Po ashtu, ekzistojnë arsye të artikulueshme për të besuar se arrestimi i z. Haradinaj është i domosdoshëm sepse rrethanat konkrete tregojnë se ai ka motivin, mjetet dhe mundësinë për të penguar ecurinë e procedimit penal, duke marrë parasysh se: (i) ai shpërndau informacion dhe dokumente konfidenciale dhe jopublike që burojnë prej Task Forcës Hetimore Speciale dhe/ose Zyrës së Prokurorit të Specializuar; (ii) bëri të ditur se do të vazhdojë të nxjerrë informacion konfidencial dhe jopublik dhe i nxiti anëtarët e mediave që të bëjnë nxjerrje të tilla të informacionit; dhe (iii) nxjerrja publike publikimi i një informacioni të tillë është bërë duke treguar një indiferencë të hapur për rreziqet e sigurisë me të cilat përballen dëshmitarë (të mundshëm) dhe me synim për të delegitimuar Zyrën e Prokurorit të Specializuar dhe Dhomat e Specializuara, të cilat ai nuk i njeh.

6. Gjithashtu, ekzistojnë arsye të besueshme për të besuar se arrestimi i z. Haradinaj është i domosdoshëm sepse rrethanat konkrete tregojnë se ai do të përsërisë, ose do të orvatet të kryejë përsëri veprat penale, duke marrë parasysh se ai e shprehu qartë synimin e tij për të vazhduar me nxjerrjen publike të informacionit dhe dokumenteve konfidenciale dhe jopublike në lidhje me dëshmitarë (të mundshëm) dhe hetime të Task Forcës Hetimore Speciale dhe ose të Zyrës së Prokurorit të Specializuar, duke provuar në këtë mënyrë se vazhdon të ekzistojë rreziku që ai të kërcënojë, frikësojë dhe të vërë në rrezik dëshmitarë (të mundshëm) përmes nxjerrjes së një informacioni të tillë.

2. Transferimi dhe objekti i paraburgimit

7. Në bazë të nenit 41(7) të Ligjit dhe rregullës 55(4) të Rregullores, në rast se z. Haradinaj arrestohet në Kosovë ose në një shtet të tretë, ai do të transferohet në

objektin e paraburgimit që mbikëqyret prej Dhomave të Specializuara dhe që drejtohet prej Zyrës Administrative.

3. Të drejtat e z. Haradinaj

8. Në momentin e arrestimit, z. Haradinaj gëzon të drejtat në bazë të neneve 21, 38(3) dhe 41(4) të Ligjit, të cilat Zyra e Prokurorit të Specializuar duhet t'ia lexojë në momentin e arrestimit.

9. Z. Haradinaj do të sillet pa vonesë para gjykatësit të vetëm në bazë të nenit 41(5) të Ligjit.

10. Në momentin e arrestimit, z. Haradinaj ka të drejtë në bazë të nenit 41(2) dhe (5) të Ligjit, të kundërshtojë ligjshmërinë e arrestimit të tij, të urdhrit të transferimit dhe të kushteve të paraburgimit para gjykatësit të vetëm dhe ka të drejtë të apelojë para Dhomës së Specializuar të Gjykatës së Apelit.

4. Urdhra të tjerë

11. Fletarrestimi, aktualisht klasifikuar si konfidencial *ex parte*, mund t'u komunikohet, ose ekzistenca e tij mund t'u bëhet e njohur të dyshuarit dhe autoriteteve të tjera kompetente të Kosovës ose të shteteve të treta, përfshirë shtetin pritës, nëse është e domosdoshme për zbatimin e fletarrestimit.

12. Duke mbajtur parasysh klasifikimin aktual të këtij fletarrestimi, gjykatësi i vetëm u kërkon autoriteteve kompetente të Kosovës ose të cilitdo shteti të tretë, sipas rastit që të mos ia bëjnë të njohur askujt ekzistencën dhe përmbajtjen e këtij fletarrestimi, me përjashtim të personave angazhimi i të cilëve është absolutisht i domosdoshëm për zbatimin dhe dorëzimin e këtij fletarrestimi zotit Haradinaj.

13. Në qoftë se ndonjë subjekt, zyrtar i qeverisë së Kosovës ose ndonjë person tjetër në Kosovë pengon zbatimin e këtij fletarrestimi, kjo mund të përbëjë vepër penale sipas nenit 15(2) të Ligjit.

14. Në bazë të neneve 53(3) dhe 54(1) të Ligjit, Dhomat e Specializuara kanë përparësi ndaj të gjitha gjykatave të tjera në Kosovë dhe ky fletarrestim ka të njëjtën fuqi ligjore si urdhrat e lëshuar nga gjykatat e tjera të Kosovës.

/nënshkrim/

Gjykatës Nikola Giju

Gjykatës i vetëm

E enjte, 24 shtator 2020

Në Hagë, Holandë.

Shënim shpjegues

Në paragrafin 4, në rreshtin 4 në anglishte duke numëruar nga fillimi i paragrafit (rreshtin 5 në shqip), është shtuar fjala “zëvendës” para fjalës “kryetari”